

Chè fanmi:

Avèk egzamen ki gen pou vini pou tout elèv ki nan klas 3yèm-8yèm ane, men kèk repons pou kesyon moun poze souvan yo. Lwa federal 2015 ki rele tout elèv reyisi (Every Student Succeeds Act, ESSA) egzije egzamen anyèl sa yo nan konpozisyon anglè (English Language Arts, ELA) ak Matematik, epi yo la pou bay enfòmasyon enpòtan sou si elèv sou wout pou gradye nan lekòl segondè avèk kapasite panse kritik, rezoud pwoblèm ak kapasite pou rezone yo bezwen pou reyisi nan kolèj ak nan machetravay modèn lan.

Egzamen sa yo se sèlman youn nan plizyè mezi lekòl nou an itilize pou evalye pwogrè: nòt klas, kanè, modèl redaksyon, pwojè, devwa ak lòt travay ki baze sou pèfòmans elèv enpòtan egalman. Pandan yo ka konsidere nòt egzamen ofisyèl yo nan desizyon y ap pran pou chanje klas, gen dwa se pa yo menm ki faktè prensipal la.

Si w gen lòt kesyon, tanpri kontakte lekòl pitit ou a.

Kilè egzamen ofisyèl yo ap fèt pou klas 3yèm rive 8yèm ane?

ELA: 25-26 mas

Ratrapaj ELA: 27 mas, 30 mas-1ye avril

Matematik: 22-23 avril

Ratrapaj Matematik: 24 avril 27-28 avril

Kòman pitit mwen an benefisye nan egzamen ofisyèl yo?

Oumenm ak pitit ou a benefisye nan egzamen ofisyèl yo paske yo:

- Bay enfòmasyon detaye sou si pitit ou a ap aprann sa yo atann li aprann nan nivo klas li.
- Ede lekòl yo detèmine ki elèv oswa gwoup elèv k ap fè pwogrè, ki anreta epi ki bezwen plis sipò, ki depase nòm yo epi ki pwofesè ki ta bezwen plis sipò.
- Pèmèt ou akonnen kòman lekòl pitit ou a ap travay lè yo konpare l ak lòt lekòl yo.

Mwen tande egzamen ofisyèl la gen mwens estrès pou elèv pase jan li te ye avan. Èske se vre?

Wi! Nan kèk ane pase yo, Depatman edikasyon Eta Nouyòk fè chanjman nan egzamen klas 3yèm-8yèm ane yo akòz enkyetid paran ak edikatè genyen. Chanjman sa yo se:

- Bay tan ki pa limite pou egzamen
- Redui kantite kesyon nan egzamen yo.
- Entegre pwofesè NYC yo nan preparasyon kesyon egzamen yo.

Ki enpòtans egzamen sa yo nan admisyon lekòl presegondè oswa lekòl segondè?

Kèk lekòl presegondè ak segondè gen pwogram ki evalye dosye akademik ki itilize rezilta egzamen eta a kòm youn nan divès kritè pou admisyon, jan yo dekri l nan [Gid Lekòl Presegondè](#) ak [Gid Lekòl Segondè](#). Elèv ki pa gen nòt egzamen yo elijib pou yo aplike nan pwogram sa yo epi yo pase lekòl yo lòd pou yo kreye règleman pou yo evalye elèv sa yo. Tanpri Kontakte lekòl yo dirèkteman pou jwenn plis enfòmasyon sou règleman endividyèl yo.

Mwen enkyete «yo pral evalye pwofesè pitit mwen avèk rezilta egzamen an». Ki konsekans rezilta nòt yo genyen sou pwofesè yo?

- Pou reponn enkyetid fanmi, kounye a règleman Eta di yo p ap konsidere rannman elèv nan egzamen ofisyèl ELA ak Matematik eta Nouyòk pou klas 3yèm-8yèm nan evalyasyon pèfòmans pwofesyonèl anyèl pou pwofesè ak direktè.
- Yo adapte kourikoulòm lekòl avèk nòm aprantisaj nivo klas la ke yon elèv ta dwe konnen ak kapab demontre.

Èske fanmi ka chwazi pou pitit yo pa fè egzamen ofisyèl yo oswa mande yon lòt egzamen?

- Avèk eksepsyon pou kèk tip evalyasyon kote li obligatwa pou gen konsantman paran, Eta a pa gen lwa ni regleman espesifik ki pèmèt paran fè pitit yo pa patisipe nan egzamen Eta yo ni mande yon lòt evalyasyon. Oumenm ak pitit ou a ap benefisye nan egzamen ofisyèl yo paske yo bay enfòmasyon detaye sou si pitit ou a ap aprann sa yo atann li aprann nan nivo klas li. Egzamen ofisyèl yo ede lekòl detèmine tou ki elèv oswa gwoup elèv k ap travay byen, sa k ap echwe avèk sa ki bezwen plis sipò, ki pwofesè ki ta ka bezwen plis sipò, ak tandans ak pwogrè ki genyen avèk tan k ap pase. Egzamen an pèmèt ou konnen kòman lekòl pitit ou a ap travay lè yo konpare l ak lòt lekòl yo.
- Si w vle pou pitit yo pa pran egzamen Eta yo ankò, se pou al pale avèk direktè lekòl pitit ou a. Si apre yon paran fin pale avèk direktè lekòl la li toujou vle pou pitit li pa fè egzamen Eta yo, direktè a ap respekte desizyon paran an. Paran an ak direktè a dwe kenbe yon dosye alekri sou konvèsasyon sa a.

Kisa yon elèv ta dwe fè pou li prepare pou egzamen an?

- Ede pitit ou a byen dòmi lavèy egzamen an epi manje byen nan maten.
- Di pitit ou a ou kwè nan kapasite l!

kilè m ap konnen kòman pitit mwen an te travay nan egzamen yo?

- Jeneralman, Eta Nouyòk bay nòt egzamen yo pandan ete epi nòt yo ap disponib nan kont lekòl vil Nouyòk [NYC Schools Account](#) pitit ou a.
- Eta a distribye tou rapò endividyèl chak elèv ki bay enfòmasyon detaye sou pèfòmans.
- Nou ankouraje w kontakte pwofesè pitit ou a oswa direktè lekòl la pou pale sou nòt egzamen ofisyèl yo ak pwogrè akademik an jeneral.

Kisa k ap pase si pitit mwen an pa pran yon egzamen ofisyèl?

Li enpòtan pou pitit ou a pran egzamen an. Tanpri fè tout sa ou kapab pou sipòte pitit ou a epi pou asire li ale lekòl nan jou y ap bay egzamen sa yo. Elèv ki absan ap gen yon dezyèm chans pou pran egzamen an pandan peryòd egzamen ratrapaj la. Si pitit ou a absan tou pandan peryòd ratrapaj la, yo p ap ba elèv la lòt chans pou pran egzamen an. Yo pa p penalize yon elèv ni fè l double yon klas sèlman paske li pat pran yon egzamen ofisyèl.